



امویلرین جماعتی تحمیق ائله‌ماقلاری.

امورلر، ریشه‌سیز حکومتلرینی آباق اوستونده ساخلاماق اوچون هر ایشه ال ووردولار. بونا گوره نه اینکی تعصّب و غارتچیلیقدان نهایت استفاده‌نی ائله‌دیلر، بلکه بو خصلتی ساخلاماق اوچون جماعتی جهالنده ساخلیدلار کی اونلارین جهالتی نین کؤلگه‌سینده، چؤرکلرینی خلافتین ایستی تندیینه یاپیشدیریب جماعتین خیرسزلیق بولانلیق سویوندان، حاکمیت بالیغینی صید ائله‌سینلر. ائله بونا گوره فرهنگ تبلیغینی، تعلیمینی، دوز تبلیغی و یازیب اوخوماغی قده‌غان ائله‌دیلر. شام شهرینه اونلارینان مخالف بیرکی وارد اولاندا اونو جماعتین ارتباطدا اولماغا مانع اولوردولار.

مثلاً هشام بن ملک، امویلرین اونونجو خلیفه‌سی، امام باقردن (ع) سؤز دوشنده دئیردی: او باقر العلوم، وصی الاوصیا و انبیاء وارثیدیر. اما او حضرتی مدینه‌دن شاما گتیرنده و شام جماعتینی او حضرته یاخینلاشماسینی گؤرنده، فوراً او حضرتین مدینه‌یه قایتاریلماسی نین امرینی وئردی. مبادا جماعت اهل بیت (ع) فرهنگی و حقّ اینن تانیس اولسونلار. چونکی غارتچیلر او زمانا قدر، جامعه‌یه مینه بیلرلر کی جماعت جهلده و خیرسزلیقدا باش آپارسین.

جماعتین فرهنگی و علمی رشدی اولماسا و عمل میدانیندا جدّک اولماسالار، جامعه رهبری علی بن ابیطالب (ع) و یا حسین بن علی‌ده (ع) اولسا، هر عصرین امویلر سلطه تاپار.

گؤزل پیغمبریمیز بویوروب: تعلیم هر انسان اوچون تنقّس و سو ایچماق کیمی هر انسانا واجیدیر. یعنی نجه‌کی دئییه بیلمز: نفس چکمیرم کی اولم، سو ایچمیرم کی اولم و . . . بلکه واجیدیر کی اولمه‌ماق اوچون نفس چکیب سو ایچسین، ائله همان جور ده تعلیم آلماق و علم جلسه‌سی تشکیل وئرماق، علمی سؤزلره قولاق آسماق، علمی کتابلار اوخوماق و علمی فیلملر گؤرماق اونا واجیدیر. طلب العلم قریضه علی کلّ مسلم و مسلمة (بحار، ج ۱، ص ۱۷۷)

بونا گوره سوادلی اولماق، مطالعه ائله‌ماق، حق و باطلی آیرا بیلماق، گون مسأله‌لرینده آگاه اولماق، توغلانماماق و جاهل قالمماق لازم و واجب مسأله‌لردن ساییلیر کی اسلام اونلارا تأکید مؤکد ائله‌ییب. البته بو ایشلرین بعضیسی کفای و بعضیسی عینی واجیدیر.

اهل بیتین (ع) مدینه‌دن هجرتی

امویلر جماعتین رابطه‌سینی مدینه و مکه شهرلری اینن تحریم ائله‌میشدیلر و بو شهرلره گئندلر نظر آتیندا اولوردولار. امیر المؤمنین (ع) و امام حسین (ع) بو وضعیته گوره بو شهرلردن چیخیب کوفه‌یه گئتدیلر کی شام اهلینه داها یاخین اولوب اونلاری هدایت ائله‌ماغا امکان تاپسینلار.